

713.  
PLANTA  
Felicitatis Publicæ,  
*in*  
SANATO PEDE  
SERENISSIMI  
FRIDERICI  
AVGUSTI

Poloniarum REGIS,

&

ELECTORIS Saxonix;

*Ad*

*Populorum Solatium*

*Ab*

Equite Polono

ERECTA.

*Anno Domini MDCCXXVII.*



VARSAVIÆ  
*Typis S. R. M. Scholarum Piarum.*






589975

III

Mag. St. Dr.

Bibl Jag  
1976 St. 2. 217 St. Dr.



# R E X SERENISSIME.




*S*ive Officiosas dolentium lachrymas, sive  
gestientium gaudia videas, nihil in affe-  
ctibus nostris mediocre, moderatum nihil,  
invenies REGVM AVGVSTISSIME.  
Raptamur potius, quàm ducimur à macro-  
ris extremitate, ad voluptatis excessum; & quantum  
possint in utramq; partem humanæ Passiones, iisdem  
oculis, eodem animò experimur. Intentatum illud in-  
tegritati nostræ magis, quàm TUO Corpori; nostris  
justius cervicibus, quàm REGIO Pedi vulnus; quem  
non

)2(



non perstrinxit? Expalluit ad feralem ictum, tanquam ad fata sua Polonia, & penè exanimis inter lachrymas adhuc squalleret, nisi hodie à convalescentis PRINCIPIS vultu nitorem assumpssisset. Nimirum publica Fortunæ Lechicæ expectatio, ita à spiritibus Tuis pendebat; ut ipsa populorum vita nihil sit aliud, quam Tuæ salutis felicissimus fructus, & eventus. Respice-  
res utinam totius (quâ latissimè patet) Poloniæ pallorem, suspiria, singultus, & suscepta quâdam contentione pro incolumitatè PRINCIPIS vota. Et licet quidem invidiosa sit præteritorum luctuum ad præsentis diei Lætitiæ, Collatio; ita tamen in libertate Nostra diligeris, ut necessitate quadam amoris, nec in periculo TUO simulari lachrymæ; nec in prospera valetudine gaudia dissimulari possunt, aut abscondi. Admitte ergo REGUM Optime: ambitiosa subditorum TUORUM oscula ad Sacratas Plantas, forsitan adhuc à lachrymis Populorum madentes. Admitte hæc pauca folia sincerissimi Voti Characterè insignita, & à cruentis Pedibus suaviter alludentem Poëtam non rejce, qui obligatō magis animō, quàm Metrō, Suō & totius Gentis studiō precatur; ut vitam TUAM quàm nobis adeo caram clementia effecit; Dii velint servare perpetuam.



# POEMA.

## ARGUMENTUM.

**I**nfernales Furie, revirescentis Poloniæ statum, sub felicissimis Serenissimi AVGVSTI auspicijs, egrè admodum ferentes, cum Fortunam Regni aliter expugnare non possent, salutem Principis variō dolorum concursu aggrediuntur: quam postquàm longius crudelitate suâ exercuerint; abscondit tandem eo digitō, qui solus in Divino Principe Mortalis erat; immortalem Serenissimo AVGVSTO Vitam, Famamq; relinquentes: Novam felicitati publicæ Plantam erigunt.

**S**istite propensos luctus, lachrymasq; fideles,  
Tergite ficcatis oculis popularia vota:  
Vivit adhuc Dominus: digitō non amplius unō  
Qui nupèr rigidæ mortis distabat ab urna;  
Vivit adhuc PRINCEPS; & complanata cicatrix  
Erigit obductō felicem vulnere Plantam;

A

In-



In qua se Lechiæ poterit fundare voluptas  
Auxiliô suffulta Pedis, qui solus iniquæ  
Jure potest tandem molimina sistere sortis,  
Publica Sarmaticæ referendo fulcra Saluti.

Phæbe Pater; teneram sic quæso nocte Pœsim  
Sic faciles animos meditatibus lusibus apta,  
AUGUSTUM nè lædat adhuc cæsura cruentum.  
Sed potius blandô mea Musa soluta lepore,  
Svavibus obsequijs vulnus mulcendo molestum,  
Non deforme Metrû Pedibus subjunge MONARCHÆ.

Si Tibi præteritos casus, conferre modernis  
Undiq; delicijs fas est: præsenteq; risu  
Antiquos si fortè juvat pensare dolores,  
Mutatum in melius cognosce Polonia vultum.  
Ferreâ belligero momenta rigentia Marte,  
Transfudère dies solidos potiore metallo,  
Pulchra redit Regno facies; & purius aurum  
Felices iterum gemmis interfert horas.  
Nuper ubi geniti Cadmeâ messe, feroces  
Confluxère viri: cerealia dona manipulis  
Exundant, pleniq; natat modò campus aristis,  
Qui nupèr tristi populorum strage tumebat.  
Non macilenta fames, tenues depascitur Vrbes  
Imperij; verum niveis invec̃ta quadrigis.  
Copia luxurians, reſeratô prodiga cornû  
Pacificas effundit opes; & rore beatô  
Prosequitur vulgi requies opulenta labores.  
Nec sibi sola legit numerosas Lechia messes,

Ho-

Hostibus ac socijs, paritèr submittit apertis  
Horrea lautitijs, & quos terrore peremit  
Sarmaticus plerumq; valor, sustentat eosdem  
Panc suô, nutritq; novas in prælia vires,  
Cunctorum irritans ditissima gleba palatum.  
Iratis olim superis sævissimus æther,  
Evomuit pavidum, virus lethale per orbem;  
Nempè venenosæ sic pestifer halitus auræ,  
Exeruit Cauros volitantes, ut nec ad ipsos  
Aspirare Deos subitâ sinè morte liceret,  
Nunc iterum placidus Zephyris clementibus àér  
Afflatu levior volat, Cœliq; benigna  
Temperies, removens contagia fœda Nothorum,  
Alternat puris suspiria candida ventis.  
Deniq; sic diri cicurata protervia fati,  
Sic justô propensa fluunt elementa tenore,  
Vt nisi scriptorum testetur Fama ruinam,  
Nulla ferè videas rediviuo vulnera Regno.  
Bellorum quidquid strepitus violenter abegit,  
Comiter arridens, & mille favoribus aucta  
Restituit Nostro rursus Fortuna decori.

Viderat hoc Munus Patriam mulcentis Olympi,  
Livida successû Discordia facta secundô,  
Atq; per effractum, caput extulit illud, avernum,  
Quod propè sexcenti spiris cinxère colubri,  
Impexas lambendo comas; adsibilat angvis  
Irata, caudâq; latus trepidante flagellat.  
Sanguineo stat in ore furor, fœdasq; salivæ

A 2

In-



Infecere genas, viridi fœtore fluentes  
In diras & probra Deum; mox lumina Cœlo  
Invidiosa ferens, sic turpibus oscitat auris:  
Ultrices scelerum Furia, quas noctis opacæ  
Squallor alit; cæciq; fovet quas Curia Ditis,  
Eumenides: ferale reis mortalibus omen  
Thysiphone, belliq; dolis insignis Enyo:  
Tuq; Megæra nocens, rabidâ quæ vesceris irâ,  
Pectoris invidiam propriò pascente dolore.  
Vosq; aliæ steriles Erebi dominantis alumnae,  
E stygia lethale caput proferte palude,  
Et lacerate comas; siquidem quam noster acerbis  
Casibus afflixit livor, quam nostra libido  
Mille ferè facibus belli ferventis adussit,  
Floret adhuc, vernalq; suis pulcherrimâ donis,  
Et veluti nostro vitium factura furori  
Tot lacerata malis, & tot jactata procellis  
Lechia; securæ Pacis requiescit in vlnis.  
Nescio quod Numen tacitis conatibus obstat,  
Nec finit extremis tumulari Regna favillis.  
Sed quid in invitos etiam mea crimina Divos  
Conjicio: non cura Jovis, cœliq; favores  
Auxiliò propiore juvant; non Martis amici  
Ferreus Umbo tegit: sed dextra potentior omni  
Influxu, superosq; etiam vincentia duos  
Brachia, Regnantis sibi subdita sceptrâ tuentur.  
AVGVSTI sunt ista reor documenta lacerti,  
Quod cum fœva strepant vicinis classica terris,

Paci-

Pacificò Lechiam demulcent Otia somnò,  
Hâc populos moderante manû, quæ sola refellit  
Quidquid ab adverso jaciat vibretq; Gradivus.  
Dormit in AVGVSTI, veluti sub grandibus alis  
Spes secura sinu, nec tandem curat Averna  
Quid possint rigida meditari sede Sorores.  
Illò Sarmaticam DOMINO gestante Coronam,  
Quem Primum fecere Dij, Fortuna Secundum  
Reddidit obsequijs ad Regia iussa paratis.  
Nullum robur habent, nullum discrimina, virus,  
Scilicet ingenium Dominantis mite, sequendo,  
Deposuerè suum sævissima Fata rigorem.  
Ergò quid infausto, miseræ residemus in orco  
Eumenides, vanasq; domi consumimus iras.  
Dum rabies nostro superest vesana furori,  
Principis est tentanda salus; Regisq; per ictum,  
Vulnera Sarmatiæ sunt infligenda dolenti.  
Sicut enim Sylvas devastatura securis,  
Postquam proceras ad cædem legerit ornos,  
Non distenta secat numerosis brachia ramis,  
Singula nec spoliât folijs virgulta caducis;  
Ast intercisâ truncum radice revellens,  
Langventem sensim resonans ferit Ascia plantam,  
Attoniti grandem nemoris faciendo ruinam;  
Sic etiam nobis non per vulgaria Fata  
Grassandum, verum Regalis Planta petenda est.  
Cujus ab influxu florentia Regna repente,  
Arescent; perdetq; suum Gens tota vigorem.

B

Aut



su Ayteluti quondam Furiarum percitus œstrô,  
Intèr spumantis crudelia pocula tabi,  
Civilis belli gustum facturum, amicis  
Ipse propinabat patherâ fumante cruorem,  
Quô nimium madidus Catilina vovebat, ut unum  
Romulidum protunc gereret Respublica collum,  
Possit ut unius gladij mucrone resolvi:  
Sic nobis hodiè similem spirantibus ausum,  
Jàm votum hoc implere licet; nam Principis intrâ  
Augustum pectus, Regni fortuna locata,  
Cum Domino pariter fatis perimetur iisdem.  
Et veluti fors ipsa foret concreta Monarchæ,  
Delicias, pacisq; decus, florentis honorem  
Sarmatiæ, tandem cum una cervice metemus:  
Dixit; & instinctus rem perfectura maligni,  
Implevit reliquas simili livore sorores.

Est locus arcano perquam funestus in orco,  
Atria protendens nigri Plutonis ad aulam,  
Nox ubi perpetuis radios exosa tenebris,  
Infinita tenet mortalis toxica vitæ;  
Illic dira lues corrosis putrida membris,  
Corpora dilanians, per apertum pascitur vlcus,  
Illic occulto lentissima febris in igne,  
Humorem sensim succi vegetantis adurit.  
Hic lethargus iners, torpore pigerrimus altô  
Dormit, & invisæ conjungit somnia morti:  
Illâ parte jacet rugis concisa senectus  
Et lucis pertæsa suæ; quam frigida tussis

Exer-

Exercet, quatiendo latus miserabile, morû.  
Indè sedet macies, pallor, vertigo, Teneismus,  
Lenta pthisis, vitioq; simul repletus aquosô (stum.  
quallet hydrops, illinc gemitus, Timor, atq; mole-  
Continuò siccis pulmonibus asthma laborat.  
Deniq; morborum reliquæ sinè nomine larvæ  
Ex illo plerumq; specu prodire videntur.  
Hæ veluti tristes Erebi Ditisq; ministræ,  
Traijciunt umbras per stagna Charontis, ad orcum;  
Quas Libythina ferox supremâ nocte resolvit.  
Ut stetit antè fores furibunda Medusa patentes  
Carceris illius, socias conclamat, & hydris  
Urget, ut emissæ favâ regione catervæ,  
Agnatum pridem furijs spargendo venenum,  
Principis inficiant corpus; quod mole jacentis  
Imperij fractum, curis Regalibus ægram  
Laxabat mentem; propriôq; perinde dolori  
Fecerat illicium, quædam patientia. Quare  
Mille laborantem circumstant fata salutem,  
Collatâq; simul rabie, certare laborant  
Innumera Pestes, cui protunc jure nocendi  
Conveniat potius tam magnæ gloria cœdis.  
Quælibet ostentat validas in vulnera vires,  
Et faciles ad cuncta manus; sic mortibus ipsis  
Ambitio quædam est, Domini præscindere filum,  
Ut niteat raptò lethalis pallor ab ostro.  
Lurida custodit morborum turba cubile,  
Inquitq; dolor, quâ possit parte latentem

B 2

Prin



Principis afflicti citius deducere vitam.  
Imprimis tentatus apex est verticis; in quo  
Consilij semper Sacraria pura vigentis,  
Constituit quædam Divinæ mentis imago.  
Sed desperatò mors languida protinus ictu  
Non potuit tetigisse Caput, quod jam altius omni  
Porrectum fato, Regni fortuna levavit.  
Vndè suas urgendo minas, mox vultibus illis  
Insidiata fuit, quibus est expressa severi  
Forma supercilij, sic justò ducta colore,  
Vt placido præfens Majestas mista lepori  
Temperiem quandam moderato pingat in ore.  
Clementes oculi, faciles poscentibus aures,  
Quales esse Dijs, veterum commenta loqvuntur:  
Sed nec in hos potuit virus reperire decores,  
Conficiens sensim pulcherrima quæq; senectus.  
Ergò pectus adit, longis insigne trophæis  
Et robur validò toties Mavòrte probatum,  
Explorando fibras, quas nemo fortius unquam  
Rege meo, belli per prælia dura tetendit:  
Tam grandes meritò timuit mors ipsa lacertos.  
Extremumq; genu veluti pudibunda requirit,  
Vulneribus poscendo locum; sibi sed nec in istis  
Invenit delusa scopum, vindicta columnis.  
Altior humanis siquidem mens illa periclis,  
Communis pridem, posuit discrimina fortis.

Sensit ubi Lachesis talem lassata laborem,  
Nonnihil ambiguo voto dubitavit, & inquit:

Vidimus ablutum stygiæ torrentibus undæ  
Infantem, quem fama vetus cantabat Achillem,  
Cujus ab insolito venientia membra lavacro  
Nullum senserunt medicati corporis ictum,  
Et tamen indulgens aliquid natura reliquit,  
Vndè suum posset mors instillare venenum.  
Perditus est Plantâ, toto tutissimus Heros  
Pectore; pugnantemq; virum pars una fecellit.  
Tentabo: faciamq; novum resoluta periclum  
Ipsa ego Regnantis pedibus subjecta rogabo,  
Vt velit humanum vulnus patiendo fateri,  
Qui reliquò præfert manifestos corpore Divos.  
Dixerat, atq; suam (quam tunc fortassè gerebat)  
Excussit furibunda facem, scintilla repente  
Vna cadit, casuq; pedem delapsa sub imum,  
Membra tumescenti perimit vitiata calore.  
Gliscit in internis lethalis flamma medullis,  
Quam cum febris atrox nociturò spargeret æstû,  
Exultat Libithyna ferox, noviterq; repertis,  
Vulneribus, sese mortalia Funera pascunt.  
Vicistis, tandem furia, non desidis orci!  
Vicistis! sed Vestra minor victoria: quippè  
Tot meditata dolis, tantò concepta paratu,  
Vix Domini tenuem rabies pertingit ad ungvem;  
Vreris invidia gravius, quam vulnere PRINCEPS  
Thesiphone; Magnoq; rubes confusa cruore.  
Qui sacer ignis erat, dicendus jure profanus  
Ille venit, postquam liventis in ulcera Regni  
Exitio, Lechicum voluit temerare serenum.  
Interea tacitos nè serperet ardor in artus,



Dividit infectas incisio lubrica venas.  
O opus! o factum nimium crudele! tot ante  
Bellis intactum Medico permittere corpus;  
Id tamen & votum populi pietasq; requirit,  
Svadet & orbandi quædam compassio Regni.  
Ergo cruentatæ positura signa saluti,  
Ducite felices plagas, hoc pendet ab ictu  
Imperij vitæq; lucrum prænobile. Mirum est,  
Vix acies chalybis facinus ferale peregit,  
Spes animis fecunda redit, redit ipse Polonis  
Regnator; parvâq; neci mercede solutâ,  
Delicijs sese nostris totissimus offert. (ensem  
REX AVGVSTE, quidem Tibi non commotus ad  
Chirurgi tunc vultus erat, sed colla tremebant  
Lechiadum; nostris veluti cervicibus ictus  
Instaret: faciles Domini qui sciderat artus.  
Expavit Gens tota suum cum Rege dolorem  
Atq; Tuo fortassis adhuc in Vulnere PRINCEPS,  
Speq; metuq; simul populorum gaudia pallent.  
Sanguineus FRIDERICE quidem Tibi defluit humor  
Sed nobis veluti quodam torrente redundat  
Tempestas; tenues quæ distillata per imbres,  
Elicit insolitos luctus, & faucia tecum  
A lachrymis pupilla madet, planctûq; fideli  
Singultus populi, laceratos abluit artus.  
O! si vidissem rubei dispendia roris!  
Forsthan attonito tunc exclamare liceret:  
Siste cruentatum tandem manus improba punctum;  
Muricis hic cruor est: Tyrium qui tingere vellus,  
Et posset Patriæ meliorem ferre colorem.

Sed

Sed tamen ulterius nolo pia tela morari,  
Scindite Chirurgi fortissima membra Monarchæ.  
Et siquidem studiô mors est sic dura protervô,  
Ut velit AVGVSTI partem retinere dolentis,  
Permitto: spoliū digiti gerat illa recisi  
Nobis obveniat reliqui clementia vultus.  
Vivat & in nostram Majestas integra sortem,  
Sufficiet frons illa meæ servata voluptæ.  
Sicut enim evulsio non creditur ungve valorem  
Amisisse Leo, nec tardior ille volatus  
Est Aquilæ, cui pluma levi detonsa lacerto  
Æthereos inter cursus defluxit ab alis;  
Sic etiam FRIDERICE Tibi non obstat acerba  
Plaga pedis; nunquàm rapiant hæc vulnera robur,  
Nullaq; Regnantem faciet cæsura minorem.  
Sis licet afflicto mutilatus corpore; verum,  
Magnus adhuc remanes, ac integer, atq; cruentâ  
Victurus calcare potes discrimina plantâ.  
Livida cumq; nihil Mors Majestatis in ictu  
Proficeret, fidum voluit tentare Flemingum.  
REX gemit, atq; suo tulit ægrius ille dolore,  
Quod sibi gestorum tantâ virtute probatum  
Sors inimica Virum tetigisset: nuper adauctum  
Qui potuit digiti sinè murmure cernere vulnus,  
Consilij doluit venerabile perdere membrum;  
Carius appretians proprijs benefacta medullis.  
Vidit: & ingentem Lachesis testata stuporem,  
Dum simul alterius fatô moreretur uterq;  
Reddidit antiquam Domino Servoq; salutem.  
Hæc sunt prima Tuæ vestigia fortia vitæ,

C 2

O



O AUGUSTE Pater; qui non contentus amicæ  
Lucis eras fructû, nisi mitia (credo) vicissim  
Munus idem stabili tribuissent fata Ministro,  
Et sic, quas nuper tecum trux fama peremit  
Spes pariterq; animas redimis vivendo Tuorum.  
Ulterius rapidæ ne me impetus auferat auræ,  
Sistimur, ad Plantæ tutissima fulcra cœuentæ;  
Atq; cicatricem per basia mille fovendo,  
Hoc placet avulsos appendere carmen, ad artus:  
*Hic digitus pro Rege jacet, pro corpore membrum,  
Attamen immensum replet pars ista sepulchrum,  
Scilicet AUGUSTO nihil est in Principe parvum.  
Magna nimis pars hæc, quæ pelle recisa dolente,  
Vulneribus proprijs, funus tam grande redemit.  
Vivit, & est magno pariter defunctâ periculo  
Majestas, quæ triste neci solvendo tributum,  
Salvavit se cæde sua; funusq; peregit  
Parte sui; posthæc jam non moritura potestas.*  
Ponimus ista Tuo PRINCEPS monumenta dolori  
Optamusq; simul votis communibus omnes;  
Vt nunquam Lachesis, pedibus calcata resurgat.  
Et siquidem extremò mors sparsit ab ungve venenum  
Nunquam, vel certè serò, speratur ad ipsum  
Peruentura caput, quod tam sublimis origo,  
Funeris humani super omnes extulit ictus,  
Quando Divino facies vicina nitori,  
Nil habet in totâ quòd sit ferale figurâ.  
Innumeros dispono dies, vitæq; manentis  
Sume voluptatem, & mortali parte recisâ,  
SEMIDEVS tandem Rex vive perennibus annis.





12345

Bibl Jag